

欽定全唐文

欽定全唐文卷二百九目錄

陳子昂

一

麈尾賦

并序

大周受命頌

上大周受命頌表

爲豐國夫人慶皇太子誕表

爲喬補闕慶武成殿表

爲程處弼慶拜洛表

爲朝官及岳牧賀慈竹再生表

爲建安王賀破賊表

奏白鼠表

爲陳御史上奉和秋景觀競渡詩表

爲建安王獻食表

爲河內王等論軍功表

爲喬補論突厥表

欽定全唐文卷二百九

陳子昂

一

子昂字伯玉梓州射洪人文明初舉進士詣闕上書武后奇其才擢麟臺正字再轉右拾遺聖歷初以父老解官歸侍縣令段簡覲其富因事繫獄憂憤卒年四十三

麈尾賦

并序

甲子歲天子在洛陽時余始解褐與祕書省正字太子司直宗秦客置酒於金谷亭大集賓客酒酣共賦座上食物命余爲麈尾賦焉

天之浩浩兮物亦云云性命變化兮如絲之棼或以神好  
正直天蓋默默或以道惡強梁天亦茫茫此仙都之靈獸  
固何負而罹殃始居幽山之數食乎豐草之鄉不害物以  
利已不營利以同方何忘情以委代而任性之不忘卒罹  
網以見逼愛庖丁而惟傷豈不以斯尾之有用而殺身於  
此堂爲君雕俎之羞廁君金盤之實承主人之嘉慶對象  
筵與寶瑟雖信美於茲辰詎同歡於疇昔客有感之而歎  
曰命不可忍神亦難測吉凶悔吝未始有極借如天道之  
用莫神於龍受戮爲醢不知其凶王者之瑞莫聖於麟遇

害於野不知其仁神旣不能自智聖亦不能自知况林棲而谷走及山鹿與野麋古人有言天地之心其間無巧冥之則順動之則天諒物情之不異又何有於猜矯故曰天之神明與物推移不爲事先動而輒隨是以至人無已聖人不知子欲全身而遠害曾是浩然而順斯

大周受命頌

臣聞大人升階神物紹至必有非人力所能存者上招飛鳥下動泉魚古之元皇祗承上帝所以協人社匹天休卓哉神明昭格上下莫不以之矣是故物有可則而道有可

宗謂之文獻其原上也緬哉有唐欽崇天命三祖繼統品  
物咸章元厯改元黃瑞告神皇出地軸陟天階厯軒轅登  
太昊集乎初始之極以授我皇符鳥之肇開辟元台女希  
氏姓神功大哉莫不盛於茲日矣乃察璿璣稽寶命發元  
誠升紫圖則天粲然皇文炳也非夫昇光之曜魄寶之精  
其孰能威神皇赫赫若斯者哉是時三階底平百揆時序  
天下昌矣元功溥矣西土耆老欣然來稱曰至哉天子恤  
我元元勤勞下都升聞上帝臣聞天無二日土無二王皇  
帝嗣武以主七鬯豈不宜乎神皇窅然乃登崑崙之臺修

三統觀五始探命厯之紀則知元氣之所造也方採鍾龍  
象鳴鳳協林黃之律以因生賜姓九月戊申朔八日乙卯  
神都者老遐荒夷貊縉衣黃冠等萬有二千餘人雲趨詣  
闕請曰臣等聞王者受命必有錫氏軒轅皇帝二十五子  
班爲十二姓高陽氏才子二八命爲十六族書云祇台德  
先不拒朕行然則聖人起則命厯昌必有錫氏之規臣等  
伏惟陛下受天之符爲人聖母皇帝仁孝肅恭神明可以  
纂武承家以克永代陛下崇錫類垂憲章不易日月天人  
交際斯亦萬代之一時臣等固陋不達大道敢冒死上聞

神皇穆然方御珍圖謙而未許也越翌日丙辰文武百寮又與耆老夷貊道俗等五萬餘人守闕固請曰蓋臣聞聖人則天以王順人以昌今天命陛下以主人以陛下爲母天之丕律元命也人之大猷定姓也陛下不應天不順人獨高謙讓之道無所憲法臣等何所仰則敬冒昧萬死固請是時闕一  
字踵琨吾有鳳鳥從南方來厯端門羣鳥數千蔽之又有赤雀數百從東方來羣飛映雲迴翔紫闈或止庭樹有黃雀從之者又有慶雲休光半天傾都畢見羣臣咸覩於是衆矚雲萃囂聲雷動慶天應之如響驚象物其

猶神咸曰大哉非至德孰能覩此昔唐虞之瑞逖聽矣今  
則見也天物來聖人革時哉况鳳者陽鳥赤雀火精黃雀  
從之者土也土則火之子子隨母所以纂母姓天意如彼  
人誠如此陛下曷可辭之昔金天鳳凰鎬京黃鳥赤氏朱  
鴈有吳丹鳥皆紀之金冊藏之瑞府以有事也陛下若遂  
辭之是推天而絕人將何以訓於是皇需然曰俞哉此亦  
天授也乃命有司正皇典恢帝綱建大周之統厯革舊唐  
之遺號在宥天下咸與惟新賜皇帝姓曰武氏命爲嗣皇  
崇乎紹天統物其赫胥大庭之上事已乃獻頌曰

天命神鳳降祚我周形容有穆其儀孔休惟我有周實保  
天德上帝臨命纂承皇極人曰天祐有皇女希造天立極  
緬然猷徽赫我皇帝乃先厥微匪天之命鳳鳥誰歸因生  
錫氏革號循機豈不順乎天而應乎人帝曰俞哉

上大周受命頌表

臣子昂言臣聞昔周道昌而頌聲作遂能昭配天地光烈  
祖宗垂之無窮永爲代典伏惟神聖皇帝陛下闡元極昇  
紫圖光有唐基以啓周室不改舊物天下惟新皇王以來  
未嘗覩也臣聞仲尼曰聖人邱不得而見之矣又曰舜禹

之有天下邱不豫也又曰鳳鳥不至河不出圖邱已矣夫  
皆傷不得見大道之行而鬱悒也臣草野愚陋生長休明  
親逢聖人又覩昌運舜禹之政河洛之圖悉皆目見幸亦  
多矣今者鳳鳥來赤雀至慶雲見休氣昇大周受命之珍  
符也不稽元命探祕文採風謠揮象物紀天人之會以協  
頌聲則臣下之過也有國彝典其可闕乎臣不揣樸固輒  
獻神鳳頌四章以言大周受命之事誠未足以潤色鴻業  
揄揚盛美亦小臣區區丹慊之至謹輒詣洛城南門奉進  
塵冒旒冕伏表慚惶

爲豐國夫人慶皇太子誕表

臣妾某言今月日伏承軒宮載誕皇嗣克昌品物咸歡天  
人交慶臣妾聞聖人多子祝美於堯年螽羽宜孫稱道乎  
周頌自非璿圖配永寶祚靈長何以茂對天休光紹大業  
伏惟皇太后陛下星虹授祉月夢延禎餘慶集於天孫榮  
光流於帝子玉衣方泰瑤渚增輝其竊寵中姻承恩外戚  
塗山之慶既裕於夏臺高襟之祠未陪於殷薦竊以潢汙  
之品可享王庭元秬之微有芳天獻豈圖美於豐侈信有  
厚於由衷敢用擬議蘋蘩精誠菽藿洗心而薦竊希瑤席

之珍潔意而羞以陪金鼎之實謹獻食若干與胃贊珍膳  
沾汙象筵追用慚惶伏表悚灼

爲喬補闕慶武成殿表

臣某言臣以今月日奉勅於武成殿喚臣入問骨篤祿等  
賊請降事臣以愚瞽得踐赤墀對揚天休具奏其狀天恩  
特賜臣溫顏又降問云洛陽宮室皆隋朝營制歲月久遠  
方有隙頽樓閣內殿凋落者衆補一壞百無可施功唯此  
武成確然端立土木丹綵光色如新不知何故得自如此  
卿之博識應知其說臣當時造次略奏其梗概退而再省

未涉萬分臣恭惟聖言繩求神像研幾太極幽贊元符上  
以稽驗神謀旁以合契冥數信有至道允在於茲臣聞聖  
人有言曰清明在躬志氣如神嗜欲將至有開必先天降  
時雨山川出雲此蓋言神應必有其物陛下至尊至神爲  
天下主宰御羣品威統百靈宸居尊嚴品物昭泰自天而  
祐於是用寧抑臣又聞物之有靈如人之有神神之和暢  
則支體便利用人繁昌則物必豐茂所以見其俗知興廢  
之數覩其氣識盛衰之由服物猶然况其大者今陛下應  
天受命括地登樞先飛名於祕籙終據圖於寶座今則當

千載之運得三統之元帝氣氤氳祚基於元命皇圖幽藹  
象顯於天成夫以德之休明尚榮草木化之昭慶且變烟  
雲况皇皇真君龍居其極武成合慶土木增榮獨超衆殿  
夫何足怪臣聞敬其事者必載其文美其業者必頌其德  
臣所恨才非墨妙思乏筆精不能贊揚休祚歌詠聖德臣  
請以此事付之史臣千代知神萬載知述伏願天恩特垂  
降許

爲程處弼慶拜洛表

臣某言臣糞土殘魂合竄荒裔特蒙陛下施再生之德赦

萬死之誅起骨九泉同列編戶臣誠萬死無以上答况恩  
全賤命生在帝鄉伏見陛下至德配天化及草木天不愛  
寶洛出瑞圖地不藏珍河開祕籙陛下恭承天命因順子  
來建立明堂式尊顯號成之匪日功若有神萬國咸歡百  
靈同慶元正肇祚品物惟新陛下郊祭是天總受羣瑞神  
靈慶戴萬福攸宜斯實曠古莫聞於今始見喙飛蠕動莫  
不歡心臣以糞土窮骸不合輒同朝賀以古來大禮莫盛  
於今昔登封泰山七十四主明堂布政無三數君誠以陛  
下道冠古今恩溢天地昆蟲草木猶或相歡况臣久蒙驅

策今日又拔死爲生溝壑殘骸而得再造遂得恭聞大禮  
側聽鴻名臣伏惟宇宙之中含氣之類蒙恩負德獨臣最  
甚向非陛下慈造曲被鴻私臣已灰滅遐荒肝塗邊壤豈  
得尚存骸骨恭聞聖慶臣所以匍匐冒死不避誅戮冀申  
螻蟻之情以同鸞雀之慶然臣自惟罪累不可比人在於  
禮經尤宜自絕所以屏營糞土不敢先聞今旣萬國禮終  
百神慶畢昆蟲鳥獸亦並歡寧故臣螻蟻之誠始敢冒死  
上賀臣伏知冒禮違法罪合誅夷臣生見明時豫聞嘉慶  
臣今卽殞滅實萬死爲榮不勝歡踴戴賀之誠

爲朝官及岳牧賀慈竹再生表

臣等言臣聞天視自我人視天聽自我人聽故堯臣放命  
降震怒之災姬聖尊仁受昭事之福先王所以恭畏上下  
祇奉天人於是昭德塞違懲惡勸善所以明枉直正典  
刑一昨伏奉恩勅宣示司農卿宗晉卿所奏日者王德壽  
等承使失旨虐濫無辜災感蝗蟲毒痛慈竹寧歲爲之饑  
饉毗庶以之流離冤魄冥呻元感上惻乃降明制發德音  
恤淫刑蠲虐典於是幽魂雪憤遺噍昭蘇枯竹由其再生  
蝗蟲爲之韜眚一作隕跡祥蠻動色瘴癘收氛當天札之凶年

致昇平之稔歲非夫聖靈昭感天人合符何吉凶之徵報

同影響天下幸甚臣等聞聖人法天所以順物小人違道

則必亂常故虞稱欽明嚴四凶之罪魯有仁義正兩觀之

誅所以邦家用昌苛慝不作王某等色厲內荏心僻行堅

弄措一作指

刑之文爲商夷之法以訟受服同惡自尤竟招

殛竄之辜允肅政刑之序今日蒼鷹斂翼乳虎含牙朝廷

無腹誹之憂天下有刑措之頌信可以懲殘創酷誘善旌

寬永清侮弄之階共登仁壽之城臣等謬贊臺閣忝守藩

維實思仰奉大猷以穆中典幸屬至聖崇德小人勿用凡

卷之三十一  
九  
在庶品實百恒歡雖成康頌聲文景默化刑清政肅曾何  
足云伏乞書之國經頒示天下使四方風動萬國歸仁垂  
範後昆以爲炯戒無任慶抃之至

爲建安王賀破賊表

臣某言今月日得遼東都督高仇須等月日破逆賊契丹  
孫萬斬等一十一陣露布并捉得生口一百人送至軍前  
事三軍慶快不勝踴躍臣聞天之所棄雖暴必亡人之共  
讐在遠彌戮況凶羯遺醜未及犬羊固作孽以招誅自辜  
恩而取滅伏惟陛下威加四海子育百蠻鬼神尚不敢違

凶狡豈能逃罪逆賊萬斬等天奪其魄生自爲殃仇須等  
謹奉廟謀遠憑國計短兵纔接羣逆銷亡返風迴烟薰睛  
掩自此乃天威潛運神道密周豈止人謀抑由靈助今盡  
滅殃病孽固折服飢災兼至凋弊日滋未加天兵應自糜  
爛臣訓勵士馬今日剋行大軍一臨凶寇必殄獻俘在卽  
拜闕有期預喜承恩思勝慶賀無任抃快之至

奏白鼠表

臣某言今月日臣等令中道前軍總管王孝傑進軍平州  
十九日行次漁陽界晝有白鼠入營孝傑捕得籠送者身

如白雪目似黃金頓首跼伏帖若無氣將士同見皆謂賊降之徵臣聞鼠者坎精孽胡之象穿竊爲盜凶賊之徒固合穴處野居宵行晝伏今白日歸命素質伏辜天亡之徵兆實先露自孝傑發後再有賊中信來不謀同詞皆云盡滅病死親離衆潰匪朝卽夕臣訓兵勵勇取亂侮亾昔宋剋鮮卑蒼鷺入幕今聖威遠振白鼠投營休兆同符實如靈契凡在將士孰不歡欣執馘獻俘期在不遠

爲陳御史上奉和秋景觀競渡詩表

臣某言伏見某月日御製秋景務餘聊觀競渡故陳先作

式佇來篇凡六韻天文爰降品彙咸亨金簡潛開瑞圖斯  
見臣聞白雲興詠漢遊汾水之祠黃竹申歌周舞瑤池之  
駕然而志崇遠轍事或勞人故文思之化未光太清之道  
猶闕伏惟聖母神皇陛下太虹齊聖感月含神元德茂於  
皇階文明照於天下用能提玉斗挹璿衡百神景從三靈  
協贊青雲出洛爰開受命之符赤甲榮河終御興王之寶  
非窮神之至德者其孰能與於是哉旣而黃屋務閑紫機  
時暇洞庭張樂思接軫於軒遊媯水披圖想同驥於堯輦  
然而遠而勞物者未若近而安人動而勤已者豈比靜而

秦神於是從金蹕鳴玉鸞清禁林御池殿肅波神一作臣而

戒事命舟子爲水嬉彩鷁蓮歌乍起江吳一作江之引青龍

桂櫟時搖甌越

一作時  
謳女

之風鳥逝虬驚沸珠潭而競逐雲

飛電集橫玉浦而流光信可以娛樂惟靈發揮文物皇歡

允洽白日俄光於是奏薰風於管絃詠叢雲於林籞帝歌

爰作天藻攸彰黼帳帷宮縕文房之綉綵祥雲瑞景霏翰

苑之榮光信探道

一作  
躋

於元包得斯文於紫極太平允矣

元首康哉方欲朝明堂之宮輯羣后之瑞尊崇顯號光啓

聖圖封玉嵩邱以接千年之統泥金少室攸增萬歲之規

卓哉煌煌聖君之表也微臣曲學蓬戶竊位蘭臺未聞騁  
馬之謠非有雕龍之思鞠躬霜署謬覩於天章逖聽鈞臺  
側聞於帝樂天文尊貴一作貴不遠於下臣帝寶珍崇曲宣  
於近貴竊以君唱臣和固不隔於尊卑宮變商從方允諧  
於金石輒用齊心扣寂假翰求詞將以舉日月之末光繼  
螢燭之微照不勝云云

爲建安王獻食表

臣謬藉葭莩叨榮圭組元戎出塞違鳳扆而逾年班師入  
朝拜鸞闈而有日策勛飲至頻承湛露之恩獻壽奉觴未

申行潦之薦所以白茅微藉願享於鈞臺黃汚菲誠思奉  
於瑤水謹輒獻食一百舉伏知金雞瑞鼎盈上帝之珍羞  
玉女行廚盡羣仙之品味以茲菲薄有類蘋蘩多慚在藻  
之歡竊有獻芹之志所願皇慈俯納丹慊獲申天子萬年  
永慶南山之壽微臣百拜長承北極之恩無任誠懇之至

爲河內王等論軍功表

右金吾衛大將軍兼檢校洛州長史河內郡王臣懿宗加  
爵一等勳五轉司賓卿兼羽林大將軍建安郡王攸宜加  
爵一等勳七轉臣某等言伏奉月日制書錄臣等在軍徵

功特加前件勳封嘉命聿至寵渥載優伏對慚魂殞首顛  
越云云臣聞古者名將先士卒而後身故其功勸末世庸  
將窮人力以寵已故其政乖然則簞醪投河三軍告醉利  
印在手萬夫以離夫與衆共功專已獨利成敗之理興亡  
繼焉賞者國之大事故不可忽日者林胡構孽敢亂燕陲  
陛下徵義兵誅不道天下士庶叢集星馳皆忘身憂國紓  
禍郤難至於躬先矢石血塗草莽冒艱險厯寒溫氣騰青  
雲精貫白日誠亦勤矣雖聖靈威武逆虜自滅然士卒戮  
力亦盡其勞今大功未酬衆議猶在而臣等駑怯猥加先

封臣等不能折衝虜廷還師衽席今坐加茅土之賜以先  
將士之勤使鵠冠虎臣將何以勸今戰士留滯於外府軍  
吏咨嗟於下寮臣等胡顏敢冒天造夫賞一勸百猶恐未  
孚利一沮萬其弊誰救爵命不可以招謗國章不可以假  
人伏願天光俯回昭發軍禮請以臣等前件勳封迴受戰  
功人及立功將士等上以明國之大賞下以雪臣等謬功  
使人悅忘勞士感知死然後兵可訓勵賊可誅屠此誠國  
之元經不可苟而利者臣等不勝區區

爲喬補闕論突厥表

臣某言臣以專蒙叨幸近侍陛下不以臣不肖特勅臣攝  
侍御史監護燕然西軍臣自違闕庭歷涉秋夏徒居邊徼  
無尺寸之功臣誠暗劣孤負聖明然臣久在邊隅夙夜勤  
灼莫不以蕃事爲念俾按察之比以突厥離亂事跡參驗  
委曲窮問往來竊有以得其眞莫不自爲鯨鯢遞相吞食  
流離殘餓莫知所歸臣誠愚不識事機然竊以往古之變  
考驗於今乃知天凶凶醜之時陛下收功之日然臣聞之  
難得易失者肯也易遇難見者機也聖人所貴者去禍於  
未萌今陛下體上聖之資開太平之化匈奴爲中國之患

自上代所苦久矣合天降其災以授陛下萬代之業在于  
今時臣請以秦漢以來事跡證明之伏願陛下少留聖聽  
尋繹省察天下幸甚臣聞始皇之時併吞六國制有天下  
按劖叱咤八荒犇馳然匈奴彊梁威不能服牧馬河內以  
侵邊疆始皇赫然使蒙恬將四十萬衆北築長城因以逐  
胡取其河南之地七百餘里當時燕齊海岱贏糧給費徭  
役煩苦人以不堪故長城未畢而閭左之戍已爲其患二  
世而亡莫不始於事胡也至漢興高祖受命率羣雄乘利  
便以三十萬衆窘迫白登七日被圍僅而獲免自是歷呂

太后至孝文帝單于桀驁益凌漢家文帝徒以遜詞致獻  
金帛但求其善和而已不敢有圖賈誼所以哭之痛文帝  
以天下之盛而卑事戎狄以倒懸天下也至景帝時邊受  
其患於是漢武踐祚以承六代鴻業屬乎文景元默之化  
海內乂安太倉之粟紅腐而不可食內庫之錢貫朽而不  
可校財力雄富士馬精彊忿匈奴之驕慢將報先帝之辱  
遂使王恢韓安國將三十萬衆以馬邑誘單于師出徒費  
竟無毫髮之功於是大命六師專以伐胡爲務首尾三十  
餘年中國騷然大受其弊至於國用不足軍興不給租及

六畜算及船車盜賊羣興京師起亂竟不能制單于之命一日而臣服之漢宗衰殘幾至覆社稷也故漢武晚年厭兵革之弊乃下哀痛之詔罷輪臺之遊封丞相爲富民侯將以蘇中國也至宣帝代罕復出師屬匈奴數窮天降其禍虛閭權渠單于病死右賢王屠耆堂代立骨肉大臣自不相服又立虛閭權渠子爲呼韓邪單于擊殺屠耆堂諸名王貴人各自分立爲五單于更相攻擊以至大亂殘虐死者計萬億數畜產耗減十至八九人以飢餓相燔燒以求食於是寄命無所諸名王貴人右伊秩訾且渠當戶以

下將兵五萬稽首來降於北方晏然靡有兵革之事直至  
哀平之際邊人以安臣竊以此觀匈奴之形察天時之變  
盛衰存亡之機事可見也然則匈奴不滅中國未可安臥  
亦明矣夫以漢祖之略武帝之雄謀臣勇將勢盛雷電窮  
兵蹟武傾天下以事之終不能屈一王服一國宣帝承衰  
竭之後撫瘡痍之人不敢惕然有出師之意然而未有遺  
矢之賚而臣僕於單于之長者其故何哉蓋盛衰有時理  
亂有數故曰聖人修備以待時是以正天下如拾遺陛下  
肅恭神明德動天地今上帝降匈奴之災孽遺陛下之良

時不以此時順天誅建大業使良時一過匈奴復興則萬代爲患雖後悔之亦不及矣古語曰天與不取反受其咎今天意厚矣陛下豈可違之哉臣比在同城接居延海西逼近河南口其磧北突厥來入者莫不一一臣所委察比者歸化首尾相仍攜幼扶老已過數萬然而瘡痍羸憊皆無人色飢餓道死頗亦相繼先九姓中遭大旱經今三年矣墾皆赤地少有生草以此羊馬死耗十至七八今所來者皆亦稍能勝致始得度磧磧路既長又無好水草羊馬因此重以死盡矣不掘野鼠食草根或自相食以活喉命

臣具委細問其磧北事皆異口同辭又耆老云自有九姓  
來未曾見此飢餓之甚今者同羅僕固都督早已伏誅爲  
亂之元其自喪滅其餘外小醜徒侵暴自賊耳本無遠圖  
多獵葛復自相讐人被塗炭逆順相半莫知所安回鶻諸  
部落又與金州橫相屠戮羣生無主號訴嗷嗷臣所以願  
陛下建大策行遠圖大定北戎不勞陛下指揮之間事業  
可致則千載之後邊鄙無虞中國之人得安枕而臥豈不  
在陛下斷哉且匈奴爲中國患非獨秦漢之間臣竊惟先  
聖時衛公李靖蓋中國之一老臣徒藉先帝之威用妙勝

之策當頡利可汗全盛之日因機逐便大破虜庭遂繫其  
侯王裂其郡縣六十年將於今矣使中國晏然斥堠不警  
書之唐史傳之無窮至今天下謂之爲神况陛下統先帝  
之業履至尊之位醜虜狂悖大亂邊陲皇天遺陛下以鴻  
基之時陛下又得復先帝之跡德之大者其何以加若失  
此機事已過往使李靖豎子獨成千載之名臣愚竊爲陛  
下不取也伏見去月日勅令同城權置安北都護府以招  
納込叛振匈奴之喉臣伏慶陛下見幾於萬里之外得制  
匈奴之上策臣聞隗囂言漢光武見事於萬里之外制敵

應變未嘗有遺今陛下超然神鑒遠照實所謂聖明之見  
覩於無形也臣比住同城周觀其地利又博問諳知山川  
者莫不悉備其地東西及北皆是大磧磧並石鹵水草不  
生突厥嘗所大入道莫過同城今居延海澤接張掖河中  
間堪營田處數百千頃水草畜牧供巨萬人又甘州諸屯  
犬牙相接見所聚粟麥積數十萬斗因水利種無不收運  
到同城甚省功費又居延河海多有魚鹽此所謂強兵用  
武之國也陛下若調選天下精兵采拔名將任以同城都  
護臣愚料之不用三萬陛下大業不出數年可坐而取成

臣比來看國家興兵但循於常軌主將不選士卒不練徒如驅市人以戰耳故臨陣對寇未嘗不先自潰散遂使夷狄乘利輕於國威兵愈出而事愈屈蓋是國家自過計於敵爾故非小醜能有異圖臣竊以爲陛下今日不更爲之圖以激勵天下忠勇但欲以今日之兵今日之將冀收功於異域建業於中興則臣之愚蒙必以爲未可得也陛下卽以突厥爲萬代之患則臣所言願加察若以夷狄荒服不臣小人非所敢諫臣今監領後軍某等取某月卽渡磧去計至某日及劉敬同謹當請按行磧計至比已來地形

及突厥滅亡之勢當審虛實續以奏聞伏願陛下省臣此  
章爲國大計儻萬有可一中者請與三事大夫熟圖議之  
此亦萬代一時也伏願少留聖意閑暇念之天下幸甚陛  
下採臣芻蕘臣請執殳先驅爲士卒啓行橫行匈奴之庭  
歸報陛下臣死之日庶無遺恨不勝云云

欽定全唐文卷二百十目錄

陳子昂

二

爲人陳情表

爲程處弼辭放流表

爲將軍程處弼謝放流表

爲赤縣父老勸封禪表

爲永昌父老勸追尊中山王表

爲人請子弟出家表

爲義興公求拜掃表

金匱全周文  
卷二十一  
一  
爲義興公陳請終喪第二表

爲義興公陳請終喪第三表

爲副大總管屯營大將軍蘇宏暉謝表

爲副大總管蘇將軍謝罪表

謝衣表

謝賜冬衣表

爲建安王謝借馬表

謝藥表

爲宗舍人謝聘贈表

初七謝恩表

遷祔謝恩表

爲僧謝講表

謝免罪表

爲張著作謝父官表

爲王美暢謝兄官表

爲武奉御謝官表

爲百官謝追尊魏國大王表

爲司農李卿讓本官表

卷之二十一  
二十一  
爲陳舍人讓官表

爲司刑袁卿讓官表

爲資州鄭使君讓官表

爲金吾將軍陳令英請免官表

欽定全唐文卷二百十

陳子昂

二

爲人陳情表

臣門衰祚薄少遭險疊行年三歲嚴父早亾慈母鞠育哀  
惄相養臣又尪羸少多疾病零丁孤苦僅得成人老母憫  
臣孤蒙恐不負荷教誨師氏訓以義方家貧無資紡績以  
給束修衣褐並出母指臣旣無姊妹寡有兄弟衡門獨立  
唯形與影母子相視惄惄靡依懼此艱虞厯二十歲臣稍  
以成立忝迹朝班薄祿微資始期色養私情獲遂母子相

歡殃罰不圖老母見背攀號何及泣血漣沥於時日月非  
宜權殯京兆歲序遷速於今集年臣本貫河東墳隧無改  
先人邱壟桑梓猶存母亡客居未歸舊土宿草成列拱樹  
荒涼興言感傷增以崩咽今卜居宅兆將入舊塋明年吉  
辰最是良便除此之際未有剋期臣謬齒王人職在驅役  
今歲奉使已至居延單行虜庭絕漠千里臣雖萬死無答  
鴻恩恐先朝露有負眷知老母一作老母伏惟陛下仁隱自天孝思  
在物哀臣孤苦降鑒幽冥使臣來年得營葬具斬草舊域  
合骨先墳保送羈魂獲申子道烏鳥之志獲遂私情遷窆

事畢馳影奔赴雖卽殞歿甘心無憾

爲程處弼辭放流表

糞土臣某言臣以殃釁姪構凶逆臣合宗族誅戮以顯國刑不謂天慈哀矜宥從寬典全臣骸骨生竄遐荒窮魂再造以崩以躍中謝臣聞忠臣事君如子事父窮痛之至則呼所親何者君父恩深臣子懇切况臣蒙陛下恩遇如子於母今爲子不孝爲臣不忠長辭闕庭永沒荒裔悲窮痛恨荼毒誰依卽使朽骨埋魂長滅泉壤懇誠莫展幽翳明恩實恐隱匿於君不盡臣節明神誅殛瞑目貽殃輒敢隉

裂肝心罄竭誠懇殘喘冒死期以少謝伏惟聖母神皇陛下哀憐垂察中謝臣聞犬馬賤畜尚知主恩草木無心猶感德化臣雖鴦猥不足比人負榮懷恩能無感激臣山東孤賤朝無親故性識愚鈍材無可堪非能矯跡立方飾行軌物假借名譽爲時吹噓遂得宿衛階墀忝職郎將勤勞莫紀尸素已多任經十有三年竟無一階升錄臣之鴦劣於此可見而貪冒榮寵尚不知歸陛下應天受圖恢纂大業又不以臣鴦鈍特見褒昇擢任中郎委以心膂存職未幾卽檢校將軍纔逾一年又加正授未盈三歲貴顯朝端

寵渥隆崇莫與臣比每刻肌骨曉夜思維臣以何功謬私  
天造超羣越輩顯赫明朝應由天性專愚志一守直行不  
負物心不愧神盡忠事君竭力養母所以聖慈幽鑒曲照  
懇誠寵任無疑委同親近不然愚臣何以叨此殊恩臣凶  
險罪深母不終養爰初遘疾以至終亾天慈再三降鑒賜  
藥酒脯珍膳繼踵臣門優問殷勤若同親戚臣之母子何  
德於天子貴母榮恩禮重疊臣誠不孝至頑至囂蒙此恩  
榮豈無感戴臣愚性爲善不願人知非敢自矜用爲僥倖  
皇天后土實見赤心臣往任郎將之日陛下特以臣貧賜

銀及綵臣以天恩非分矜憇賜臣懷戴之心祈懇冥報遂  
用於天宮寺寫書造像半爲聖人半爲老親臣以君親之  
恩所宜並報報是當理不合人知自爾造成一無知者臣  
今日獲罪不合上言實以事君之心所宜罄盡善惡有隱  
恐負赤誠恐臣長沒黃泉無見聖日區區之意安可不陳  
臣每以陛下恩深微臣命淺嘗願涙宗滅族獲報萬分何  
圖誠効未申凶孽先集逆天反道背德辜恩汚辱門宗虧  
缺臣節此臣所以椎心泣血仰天號咷長負陛下之恩終  
無上報之日煩冤荼毒心肝以糜比者待罪幽囚以殞身

碎首爲奉陛下賜書示喻照察臣心所以捧戴偷生假恩  
殘喘今旣蒙寬法兄弟獲全投竄遐荒甘禦魑魅臣之慶  
賴復何可言所恨凶母弃背卽遭此禍几筵塗炭孤魂熒  
熒存者流離亾者哀痛辛酸幽顯爲世所悲應由臣不孝  
不忠延此禍酷何以面目下見先臣何以心顏拜辭天闕  
生死無措永訣於今卽以某月日部勒妻子奔波就道卽  
應死滅結草幽泉伏願聖母神皇陛下至尊寶神爲萬姓  
加膳天下禔福以祐蒼生壽若南山永永無極不勝戀慕  
感咽之至

爲將軍程處弼謝放流表

臣某言臣無教訓家有逆子臣合汚宗滅族以顯國刑天慈哀矜放從流竄臣爲慶賴已是非圖今月遂蒙天恩以臣所坐流刑特從放釋窮骸枯骨一朝再生踴躍章惶再崩再殞中謝臣山東孤子朝無親故性識愚魯非有才能陛下超羣越輩崇以榮寵昔任郎將十有三年遂無涓塵一階昇錄自陛下踐極謬荷恩私冒寵叨榮超絕時輩從郎將檢校將軍纔逾一年卽加正授皆從宸眷非有因人寵渥隆崇莫與臣比臣之孤賤榮顯知慚臣又凶殃積罪

甘投魑魅孤負陛下之恩永爲遐荒之鬼肝腦塗地無以  
微酬豈謂天造曲矜恩及枯骨收骸溝壑返魄幽泉使魑  
魅窮魂重生聖日糞土殘命不滅荒陬荷德感恩萬死無  
報不勝感荷再生之慶

爲赤縣父老勸封禪表

臣聞帝功旣乂必昭告於上元元命攸尊必升封於厚載  
故七十二主能恢萬代之規三五六經以爲百王之典伏  
惟陛下應天受命握紀登樞包括乾坤之靈亭毒神明之  
化故能開天寶闢地珍溫洛所以升圖榮河由其薦籙羣

神旣贊衆瑞交馳謳歌於是大歸禮樂以之咸備陛下仰順天意允答神休垂顯號以居宸建明堂而治物百寮惟允萬國咸寧然則嵩岳神宗望玉鑾而來禪天中仙族佞性駕而崇封實大禮一作德之昌期膺告成之茂典况神都

爲八方之極太室居五嶽之尊陛下垂統紫微大昌黃運報功崇德允協神心應天順人雅符靈望皇圖盛業實在於茲臣等叨願堯封久忘帝力竊聞聖人封禪天下所以會昌山岳成功皇壽由其配永臣等旣爲陛下赤子陛下又爲萬姓慈親實願上報天功下順人望勒成嵩嶽大顯

尊名不勝慶幸之至

爲永昌父老勸追尊中山王表

臣聞子貴親榮聖人典禮故姬文受命尊太王之名漢祖登宸加上皇之號而皆事美帝籍業盛昌圖臣伏見中山大王道合先天功成佐命昔高祖神堯皇帝義旗爰建大號初興首贊皇基定策京邑用能神驅電掃應天順人龍躍紫微光宅區夏實賴大王之德翼成高祖之勲開國成家猶未奉答况陛下應命受天協運披圖正顯位於明堂昭大明於天下功崇五帝業盛三皇可謂寶極洪名尊崇

光大今者追尊之義猶闕於顯陵榮親之典未聞於帝號  
臣聞商周革命封祀宋之君春秋正名美虞晉之祀夫以  
興王繼絕尚不關於禮經况乎大孝尊親豈可虧於祀典  
臣等凌和白屋沐慶元門幸爲可封之人叨遇永昌之運  
伏見陛下則天法地崇孝臨人方且示天下以事親正皇  
猷以達禮蒼生之慶實賴惟新不任區區伏請上中山大  
王尊號遠以光祖宗之德下以順黎元之望

爲人請子弟出家表

臣某言臣以險艱私門不造亾父故某官先臣某早先朝

露永謝休明日月不居星紀云暮伏以先臣策名委質冠  
帶早年始自解巾卽陪軒禁終於結綬累忝榮私三厯名  
卿職參於河海入居州牧任叨於股肱而報効未聞零落  
先及啓足之日露首之慚是以臣克奉詔言志期冥報請  
以當家子弟三兩人奉爲高宗大帝出家歸道而孤營在  
疚遺屬未申奉以哀號實貫心髓今者大帝登仙之忌以  
及茲辰先臣懇誠未效他日所以乞遂冥願敢覲天恩庶  
菩提之因發揮於正覺涅槃之證幽贊於宸階先臣夙心  
無恨泉壤伏願上天降鑒微誠可哀因緣獲展存沒交慶

不勝崩迫云云

爲義興公求拜掃表

臣禍釁所鍾早日孤露墳塋莫掃松柏凋荒臣之不天實有由咎死罪死罪昔先臣下代遺訓未忘而殃罰不國家禍潛構兄弟無故並爲參商中華之言所不可道孤臣不孝萬死餘責死罪死罪然臣之負譴實陷無辜吏議不明以投魑魅自泣血去國寄命南荒歷年被病再以生死炎山漲海氣瘴窮天戴白之老俗無聞者孤臣疲羸豈望須臾分謂委骨窮溟餌身魚鱉狼荒之鬼永悲長逝不意慶

雲垂澤天渙宏流拂拭霧露生見白日躊躇昭泰情何以  
勝死罪死罪而餘殃未泯凶故薦臻亾兄濟江合家淪溺  
嫂姪俱逝一不生存尋途未中臣妻又殞重疊亾沒契闊  
山川至止之日生意盡矣誓將守死陵墓歿齒家園不圖  
恩幸曲成寵章仍及題輿別駕職是恩州再造生涯天實  
爲德死罪死罪臣自歸日淺墮廟未修荆棘荒然祭祀無  
主今卽便祇皇命遠職邊夷歲月方賒拜掃何日瞻言出  
涕感貺崩摧伏惟陛下仁養羣生孝理天下萬物咸遂各  
得其宜臣獨向隅有以長戚伏願天慈愷憐憐憫孤窮寬

以簡書之刑賜其告歸之請使得駿奔西土長號北陵獲  
申存沒之悲生謁園塋之樹稽頴松關謝不睦之辜肉袒  
山門祈自新之路刻誓肌骨奉以周旋然後退死蠻夷沈  
骸糞土甘心朽滅庶無遺恨儻昊天鑒照孤誠可哀則臣  
之鰥生志畢今日不勝崩迫之至

爲義興公陳請終喪第二表

草土臣某言去年某月日奉哀陳請乞終喪制今某月日  
奏事官賚臣所奏表迴伏讀報詔不勝悲懼陛下爲臣累  
有政能特見任用使臣移孝爲忠卽斷來表臣內愧不孝

外慚無能汚辱聖聰措身無地臣某中謝臣聞時方踰薄  
勸人以孝時方趨競勸人有禮有不至者誅而教之臣今  
不病固合辭避况臣疾發日久凶母未葬忍偷餘生望畢  
家事敢汙人倫以傷風俗昔山濤與時主有舊溫濤亦功  
存當代濤起應禮濤不歸葬守禮法者議而薄之臣於國  
家無濤崎之功舊必依詔命兼濤崎之可薄俛仰人間豈  
獨羞恥聖朝用法合置誅殛前者直省賚勑勒臣赴任使  
司準勅移貴州縣所由官吏畏懼威嚴臣所經行停留不  
得待臣出界然後奏報臣氣力羸憊奔波道路悲憂惶恐

舊疾加極半身不遂手節拘急行步飲食須人扶助近又  
兩目昏暗如有瘴冒雖生猶死不堪力强特望聖慈乞臣  
骸骨歸秦几筵及葬州里在臣私情死生願足臣今病在  
桂州俯伏待命臣風昏謬妄舉動失常頻犯天威不勝震  
恐謹遣某官奉表陳乞以聞

爲義興公陳請終喪第三表

草土臣某言臣先患風疹并兩目昏闇右手不能制物一  
足不自運動前後頗有表狀請停官職臣自到桂州病轉  
增劇更加瘴虐臥在床枕兩目漸不見物起動皆須扶引

死在朝夕敢偷祿位伏恐陛下謂臣尚顧禮教以疾辭讓  
遷延歲月待畢喪紀臣除官已來向欲一歲頻違詔命合  
正典刑陛下縱不忍罪臣殘喘乞臣餘生固不可爲臣曠  
官待臣痛損特望天恩卽爲臣替不任荒懼哀懇之至

爲副大總管屯營大將軍蘇宏暉謝表

臣聞獮狁不恭周王致其大戮將軍失律漢將被其嚴刑  
未有逆命驕天而逋豐鼓之罰込師沮衆遂寬載社之誅  
伏惟天冊金輪皇帝陛下肅恭上帝子育羣生萬國所以  
宅心百蠻由其屈膝而契丹凶狡敢竊陲邊毒虐生靈暴

殄天物皇兵順伐仗仁義以共行窮寇姦回憑險阻而猶  
鬪臣等仁虧聖略智昧詭圖遂以熊羆之師挫於犬羊之  
旅誠合結纓軍壘抵罪國章陛下以堯舜深仁且緩三苗  
之伐禹湯罪已不與萬方之辜遂得齒劙餘魂更參授鉞  
之任死綏之魄復同挾續之恩四夷義以來蘇三軍感而  
抃舞瘞瘞再起俘馘是圖將士同心誓雪孟明之恥殤魂  
其憤思亢杜回之讐臣等殉義忘生報恩惟死不任感激  
慶戴

爲副大總管蘇將軍謝罪表

臣某言伏奉某月日已前赦書赦臣萬死纔削見任官秩  
還復本將軍名始慶再生卽榮寵命宛轉踴躍感戴慚惶  
中謝臣聞鑿門受律本合忘生對敵臨戎殉節唯死此乃  
國家恒典軍政嚴科臣妄以庸才謬叨重任不能深圖遠  
筭馘醜摧凶以宣廟略之威永息邊人之患屬前軍挫衄  
士卒奔亡臣復繼驅馳戰鬪交合川谷地險客主勢殊步  
馬相懸左右受敵決命爭死力盡塗窮遂以貔貅之師劙  
於犬羊之衆誠宜刎首謝國殺身報恩陛下洪湯禹之仁  
務寬大之典愚臣同孟明之侶遂免嚴誅白骨再榮丹慊

未泯誓將枕戈嘗膽殄逆梟凶躬爲士卒之先以雪殤魂之憤肝腦塗地少答鴻私不勝荷戴再生榮幸之至

謝衣表

臣今月日午騎田楷至伏奉恩勅賜臣紫衫旱衫袴等一副臣萬死骷骨垂朽蒙榮載戰載殞肝心塗地中謝臣以駕朽叨承重任憑奉聖略誅討元凶實合震曜天威俘斬逆首而智力淺短進退無規被王孝傑陷鋒于前臣則接戰於後躬先士卒苦鬪山林自辰至酉殺賊無數嵒谷峻狹車乘相旋被孝傑敗兵回相衝突逆賊乘便重襲臣軍

士卒被傷子將多死臣決命爭首陷陣摧兒日暮兵疲瘡痍相半鳥散山谷人無鬪心臣獨無依遂失師律卽欲刎頸陣下委骨顯誠實恐身死尅傷未雪國恥所以含垢忍辱圖死闕庭今月六日至幽州卽囚繫獄戶延頸戢魄惟待嚴刑湯鑊在前分委灰土豈謂天慈矜鑒回憲增榮以其伏鑽之魂更辱賜衣之寵煩冤踊躍載兢載惶泣血嘗膽誓復國讐刻骨刻肌敢忘天造不勝已死再生感戴欣躍之至

謝賜冬衣表

臣某言中使某至伏奉某月日勅書慰問將士官吏僧道耆老等并賜臣手詔及冬衣兩副大將等衣一十五副者天慈遠致聖澤傍流海隅臣庶抃舞相慶臣某中謝伏維陛下道宏文武任切藩維遠念戎旅之勤亟頒時節之賜臣以謬膺寄理載涉炎涼効績無聞負敗將及恩私每降慚懼不寧今又俯浹宸慈曲延寵賚當戒寒之初候沐抜纊之殊榮佳氣集於城池喜容生於草木三軍叶慶萬井相歡况臣荷寵逾涯忝恩滋甚螢燭無裨於景曜畎澗徒願於朝宗悚踴遐方感戀俱切無任感恩荷懼屏營之至

爲建安王謝借馬表

臣攸宜言伏奉聖慈勅借臣廄馬四匹星旗方列天馬忽  
來祇拜恩榮抃躍兼集臣名慚白馬陣昧青龍徒憑廟勝  
之威竊總元戎之首皇師久露凶羯未孚方欲親負干戈  
身先士卒金山深入期突厥之功玉壺遂臨叨得駿之賜  
昔開東道今見西來感燕骨而長鳴君恩罔報向朔雲而  
驥首蹋頓方擒坐馳千里實愧三軍寵貴非圖榮多增懼

謝藥表

臣某言伏奉中使宣勅旨賜貧道藥若干味肅恭休命

敬受慚惶猥以眇身叨蒙大賴室殊方丈同問疾之榮施  
等醫王感能仁之惠雖褚鞭神授未可比其英蕤赤斧僕  
圖固以謝其靈氣方將駐茲營魄躅彼衰痾以要上品之  
經將希大年之壽人微惠重答施何階不勝云云

爲宗舍人謝賻贈表

草土臣某頓首稽顙臣言今月日中使某至奉宣勅旨以  
臣母喪贈物若干以給凶事孤臣鞠凶禮辱天貺稽顙拜  
命號絕迷圖中謝孤臣不天早失父蔭兄弟孤藐並未成  
人亾母哀憇鞠育見保不墜於地以及於茲勞勞私門幽

顯爲慶榮忝之望非有始圖陛下親親敦念末屬憫臣孤  
賤惠降恩休孤門載昌實始天造母子之賴以喜以惶兢  
兢孤臣未知攸答陛下又恢大運崇號寵章時復私臣弟  
兄超登顯位母子光寵榮養以申豈臣單微所能及此早  
誓先沒以爲親榮而天不禍臣延及先母號憇無及荼毒  
煩冤陛下降哀又見憫悼惠賜禮物過越典章生榮死哀  
重疊若此孤臣殘喘胡顏冒德一作日月而臣之迷塞荒謬禮  
經先遠之期又勞聖問有無之禮憂若家人天實爲之臣  
復何及卽此殞絕期以謝恩號咷崩鯁伏表迷塞不勝荒

迫之至

初七謝恩表

草土臣某頓首稽願言今月日伏奉恩勅以臣亾母初七  
特降上宮若干人給使黃門若干人并賜物若干段以給  
護齋事天恩過禮伏念號惶孤臣殃疊尚未殞滅荼毒如  
昨奄將一旬崩號無及肝心糜潰陛下慈惻哀念孤窮復  
憂齋祭恐有闕禮旣賜束帛又降上宮恩慈再三若猶未  
足自國家寵貴未聞此榮草茅孤臣何以堪處不日銷滅  
永負聖恩號泣昊天以崩以憇不勝荒迫之至

遷祔謝恩表

草土臣某頓首稽額言伏奉某月日恩勅以臣亾母遷祔特降勅給人夫及車牛服用物若干以護送靈柩至京祇奉恩私頓首崩殞臣未亾滅假息苦廬日月永往奄及先遠荒迷在疚不知禮儀陛下哀矜憫其不逮恐有顛沛憂及亾靈備物象設並自天賜祖載營送又遣官供威儀在途魂魄光寵行路延佇而以爲榮孤臣窮凶何圖至此天德彌厚殘喘待終泣血扶靈方滅歸路號感恩造窮絕迷圖不勝號噎戀恩殞絕

爲僧謝講表

僧某言一昨預內道場講恩勅殊獎賜有褒稱死罪死罪  
某實專蒙昧於至道徒以早栖真實委質香緣遂以濫越  
殊私光照寵渥日者法宮聞道講賜承恩叨玉塵之榮預  
金闈之議遂得對揚真會咫尺天威徒有明恩卒無幽贊  
不能絕王倪之間以默夸詞息毗耶之言冥通得意天休  
光被曲見稱揚羣議允懷猥忘其陋顧揣涯分實覩心顏  
將何翼亮繙徒發揮元極以念嘉惠怵惕惟憂載懷愚瞽  
而心况知愧無任慚荷之至

謝免罪表

臣某言月日司刑少卿郭某奉宣勅旨以臣所犯特從故  
免伏對恩命魂魄飛揚中謝臣巴蜀微賤名教未聞陛下  
降非常之恩加不次之命拔臣草野謬齒衣冠臣私門祖  
宗幽顯榮慶豈止微臣一身而已臣宜肅恭名節上答聖  
恩不圖誤識凶人坐緣逆黨論臣罪累死有餘辜肝腦塗  
地不足塞責陛下宏慈育之典寬再宥之刑矜臣草萊憫  
臣愚昧特恕萬死賜以再生身首獲全已是非分宮服具  
在臣何敢安臣若貪冒寵私覲顏恩造復塵舊職以玷清

猷蠻蟻微心實慚面目臣伏見西有未賓之虜北有逆命之戎尚稽天誅未息邊戍臣請束身塞上奮命賊庭效一卒之力答再生之施庶陛下威命綏服荒夷愚臣罪戾時補萬一若臣獲死鋒鏑爲厲犬羊古人結草實臣懇願不勝大造再生荷戴之至

爲張著作謝父官表

臣某言臣父某守官不謹獲罪自躬犯非清廉法宜不赦實由臣爲子不孝使父陷刑天恩不肅嚴科放全首領臣得父子相見已是非圖豈謂天澤無涯更垂休命臣父子

兄弟免罪從榮載惶載殞實慶實躍中謝臣父子凡品守  
道幽微天恩矜憫見垂采錄叨承恩幸側列陪臣自侍奉  
已來於今十有八載雖業藝無紀勞勤不聞小心恭勤實  
免愆過明明昊天實昭實察不敢有二不敢有私夙夜兢  
兢祇惕若厲所以父母兄弟皆荷恩私叨職謬官並豫供  
奉摩頂至趾豈足上酬愚臣兢兢實慚實悚不意臣父衰  
耄恃寵忘公貪潤微財取犯朝憲應是臣不忠不孝事父  
無良廉恥不羞幾諫有闕遂使陷於刑法有玷國章臣之  
萬死無補此責刻肌刻骨泣血泣天恨負聖恩以媿朝列

臣宜代父蒙罪自殞闕庭不合偷安尚求苟免誠以天波  
昭洗得更自新所以忍垢偷生尅躬自勵期効萬一補過  
酬恩灰軀糜骨以甘心願伏惟神皇陛下恩同父母矜照  
懇誠信其赤心實有罄竭

爲王美暢謝兄官表

臣某言臣兄某前某官特蒙恩詔擢授豫州司馬未及赴  
任卽以某月日改亳州司馬再三策命叨荷恩私在臣宗  
門實爲慶幸中謝臣兄自解巾從仕三十餘年五爲縣宰  
三遷州佐政皆通顯職實恭勤直道在公有終始之節平

心應物無造次之憊在於周行頗蒙推薦近屬廸貞構逆  
惑亂豫州詐誤平人自貽梟滅陛下憫荆河之俗遭此無  
辜弔汝潰之人使其昭慶以爲奉揚皇化者必藉其才撫  
馭窮人者亦資有德臣兄貞固濫承天獎遷授豫州在於  
天恩實爲超擢今者未及赴任復降授亳州重疊承恩翻  
同貶降朝廷體例實亦爲尤臣兄弟叨榮濫竊非據天慈  
改授不合冒聞但以始者承恩蒙越抽擢今有何過遂同  
左遷區區懇誠輒敢祈訴天澤伏願皇慈有裕降昭獎之  
恩臣兄竭忠獲展才之地小臣死日猶生之年

卷之二十一

爲武奉御謝官表

臣某言伏奉某月日詔書以臣爲尚食奉御肅恭休命祇  
拜寵章榮慶旣崇慚荷交集臣某中謝臣才虧琢玉學昧  
篇金徒以席寵葭莩榮光日月叨承雲渥旣曠天工而榮  
更恩昇位非德舉無階而進坐致於青霄有慶方來載光  
於朱紱臣聞瑤庭任切猶稱六尚之榮玉食禮尊實總八  
珍之貴臣術慚緣鶴業匪豢龍將何致美瓊方式和金鼎  
宏私曲被殊寵降臨天命旣不可違聖恩允宜祇戴循涯  
揣分實所非圖

爲百官謝追尊魏國大王表

臣等昨陳愚懇請上魏國大王尊號天慈恩孝降順羣情  
宇宙咸歡品物知泰云云臣聞一人有慶萬國歡心況乎  
道洽奉先義光尊號伏惟聖母神皇陛下鑠宮受命寶極  
披圖以大孝而居尊勤至仁而育物用能光於四海化及  
萬方緬惟尊祖之儀實美前王之典宸心載穆盛百辟之  
誠求帝冊終開見千年之盛禮蒼厃以之禔福皇極由其  
永昌凡在含靈孰不歡慶

爲司農李卿讓本官表

臣某言伏奉月日恩制依舊授臣中大夫守司農卿臣枯  
骨再生更蒙寵命魂魄競越不知所圖臣某中謝臣實庸  
愚本無名節庇身公族竊軒冕之餘假翼宗枝濫衣冠之  
末因循寵服累歷榮班素凜之責每深効拙之勤未補橫  
被逆賊徐敬貞以私讐架禍誣臣云與叔孝逸交通逆暨  
獄官執法寘以極刑臣腰領之誅已甘灰粉泉壤之魄分  
隔幽冥不圖天地之恩再生枯骨日月之照曲被幽泉察  
臣非辜慇臣無罪不牽文法之議特垂赦宥之慈虧蟻微  
軀復得全活自非陛下克明克聖至德至仁臣之魂骸不

保今日臣免死爲幸豈敢期榮陛下重加寵章還臣舊職  
典司宗伯以睦周親愚臣胡顏敢冒朝典况臣叔孝逸推  
使未迴在於臣愚更深待罪安敢私一作訟職以玷國章伏  
乞天恩照臣愚懇不勝感戴生榮之至云云

爲陳舍人讓官表

臣某言伏奉今月日詔書以臣爲鳳閣舍人榮命自天寵  
章非次祇奉惶越顛沛失圖中謝臣以諸生宦不期達徒  
以時逢昭泰迹忝周行非有君子瑚璉之材通儒青紫之  
秀已得評刑北寺執憲南臺鵠鳩之政無聞驄馬之榮已

極陛下天飛踐祚雲紀命官陽館初開庶政惟始金章玉  
式允恃其人如臣疲鴦宜所遐棄豈圖尚矜庸劣昭覩欽  
明任同信臣寵優時輩豫參詳於詔獄叨獎渥於宸階省  
已循躬實知非分陛下不以榮過其量職越其才遂欲超  
絕親賢參掌樞要司言鳳綺揮翰龍池愚臣何人敢冒天  
造臣聞紫機務重青鎖任隆位匪其人政由有闕臣才無  
經濟識昧典章將何以光贊帝猷奉揚休命物無異議政  
允其中臣雖小人必知不可何況乎君子豈曰能賢伏望  
妙選時英苟求衆議僉曰惟允以弼良圖愚臣懇誠非敢

飾讓

爲司刑袁卿讓官表

臣某言伏奉某月日勅授臣某官祇拜寵光魂首飛越中  
謝臣聞王者敬慎懋在典刑天下允平取茲廷尉苟非其  
任法不虛行臣本庸微名術無紀皆緣際會昭遇盛明謬  
得揚歷簪徽陪奉鴛鷺綢繆榮祿荏苒平時毫髮之功無  
聞於官守素食之責每積於公朝何嘗不悚迫惟憂夙夜  
祇畏而天恩方被寵命仍加復蒙璽誥之榮驟綰銀章之  
貴永言非據稽首知慚伏惟陛下恭已受圖任賢興化方

其合符皇極代理天工臣亦何人敢妨賢路伏見某官弱  
冠登仕早有能名每以清白洗心不爲寒溫變節誠使榮  
加天寵職察雲司必能利用文明哀矜庶獄弼成五教無  
謝於虞臣典載三墳允諧於周議愚臣暗昧不識大猷請  
乞以所授官讓與某官庶使官允其才名不失實聖明有  
得人之盛愚臣無冒貴之譏實在聖慈鑒非虛謬

爲資州鄭使君讓官表

臣某言伏奉月日制以臣爲資州刺史恭承璽命祇拜寵  
章匪服知慚循榮如失中謝臣學慚名術才乏器能而寶

厯逢時金章坐忝題輿佐嶽無展驥之庸剖竹專城闕懸  
魚之化坐嘯徒積主諾空慚伏惟陛下革命開基造天立  
極方且宏宣帝典大啓皇猷而四岳觀風不虛其任六條  
班政允屬其才臣疲朽已侵循良久昧將何式光刺舉允  
協得人伏願博選英才克諧僉議使人光理政洽惟良大  
周之命惟新愚臣之責攸息其所讓人具如別狀

爲金吾將軍陳令英請免官表

臣某頓首死罪上言臣聞軍政不臧春秋責帥故揚干之  
亂魏絳致戮所以國有明賞下無濫功臣幸以常才文武

兼閼始年十八投筆從戎西踰流沙東絕滄海南征北伐無所不至席寵門緒忝迹軒墀屬高宗崇德深仁孝理天下以臣祖父一作父子兄弟一門五人皆伏節盡忠身死王事

遂超臣不次授原州都督臣時年三十二  
一作十二職兼五

印榮絕一時階緣此恩累忝藩翰持節統部前後八州皆居塞垣當賊衝要國之重寄莫與臣比雖無長策卽戎伏胡恭守朝章保完免失屬陛下大聖矜老容愚不以臣駭怯更加寵命授以青紫遣督幽州林胡構凶王師出討士馬雲集軍務星繁糧餉軍甲動以億計臣無田疇鄉導之

策又乏杜預度支之才空竭疲駕晝夜不息以勤補拙首

尾三

一作二年彌縫闕漏幸無憊乏張元遇等不謹師律賊

得乘機遂敢長驅燕陲深入趙際臣又無李牧東胡之略  
實媿吳起西河之守使凶狡皴穀遂擾邊毗論之國憲合  
刎頸謝罪陛下又不以臣爲辜更授清邊軍副大總管五  
月恩制六月到軍逆虜天亡臣又無効至於軍功戰籍敘  
勲定勞副職日淺未及精覆大兵旋旆王師獻功而漢庭  
將軍未聞辭第雲中太守已論增級今乃竊功謬賞有忝  
朝章忠誠殉節不昭國議實由臣濫其職任過其才上不

能允副聖心中不能匡正戎律傍招物議有紊軍容臣罪  
何逃孰執其咎伏願乞賜骸骨貶歸私第式清朝序永覩  
師貞不勝待罪惶懼之至